

Script Of Evening Gojri News Bulletin 12 July 2024 at 1700 Hrs

ایوننگ گو جری نیوز بلیٹن مورخہ 12 جولائی 2024

یوہ آکا شوانی جموں بے عبدالرحمان تے محمد سفیر تیں خبر سُنو۔ پہلاں خاص خاص خبر۔

*1۔ بھارتیہ انتخابی کمیشن نے جموں کشمیر غے اندر ووٹر فہرستان ور نظر ثانی غا عمل غو جائزو لیو ہے۔

*2۔ نیٹ پیپر لیک معاملہ مانہ ملوث 4 افراد مانہ سی بی آئی رمانڈ تیں بعد پٹنہ بیور جیل بھیج دتو گیو ہے

*3۔ بھارت تے بوٹان نے ماحولیات تے آب و ہوا غا میدان مانہ سانجھا طور ور کم کرن ور رضامندی ظاہر کی ہے۔

*4۔ تے ایس ایس پی رام بن انوج کمار نے دسیو ہے کہ امرناتھ یا ترا واسطے ضلع غے اندر سخت حفاظتی انتظامات کیا گیا ہیں۔

خبراں غی تفصیل نال پہلاں عبید الرحمان۔

ECI SSR Meet

جموں کشمیر مانہ رائے دہندگان غی فہرست ور دوجی بار نظر ثانی غا کم کاج غو معائنو کرن خاطر بھارتیہ انتخابی کمیشن نے گذشتہ روز پورا عمل غو جائزو لیو ہے۔ آکاشوانی جموں غا نمائندہ نے خبر دتی ہے کہ جموں کشمیر غا تمام ضلعان غا انتخابی افسر ویڈیو کانفرنسنگ غے ذریعے اس میٹنگ مانہ موجود تھا۔ کمیشن نے 21 جون مانہ اسمبلی انتخابات خاطر جموں کشمیر تیں علا وہ ہریانہ، جھارکھنڈ تے مہاراشٹر واسطے انتخابی فہرستان غی نظر ثانی غی تاریخ 1 جولائی 2024 مقرر کی تھی۔ میٹنگ غو بنیا دی مقصد سابقہ عمل ور نظر ثانی تے بی ایل اوز غے ذریعے گھریں جا غے تصدیق، پولینگ سٹیشنان غی ترتیب تیں علا وہ دیگر متعلقہ کم کاج ور تبادلہ خیال کرنوتھو۔ اس میٹنگ مانہ جموں کشمیر غا چیف الیکٹورل افسر پی کے پولے تے کئی دیگر اعلیٰ افسر وی موجود تھا۔ اس ضمن مانہ ہونی گل بات تیں بعد 25 جون 2024 تیں شروع ہوئی ایس ایس آر تیں پہلا عمل غی آخری تاریخ 24 جولائی 2024 مقرر کی گئی ہے۔ واضح رہے سال 2023 غا دسمبر مہینہ مانہ عدالت اعظمی نے بھارتیہ انتخابی کمیشن مانہ جموں کشمیر غے اندر 30 ستمبر 2024 تک انتخابات کران غو حکمنامو صادر کیو تھو۔ تے اس ترتیب غے تحت 25 جولائی تیں 9 اگست تک مطالبات تے اعتراضات درج کرایا جا سکین۔

CBI NEET

نیٹ امتحان مانہ بے ضابطگی غے پیش نظر سی بی آئی نے او آئی سس سکول ہزاری باغ غا 4 افراد بشمول پرنسپل، وائس پرنسپل مانہ 28 جون مانہ گرفتار کیو تھو۔ سی بی آئی غی پوچھ تاچھ مکمل ہون تیں بعد انہاں مانہ پٹنہ غی بیور جیل ٹوریو گیو ہے۔ پوتھ تاچھ غے دوران انہاں مانہ سی بی آئی ہیڈ کوارٹر دہلی آئیو گیو تھو۔ واضح رہے مذکورہ پرنسپل ہزاری باغ اسکولان غو کو آرڈینیٹر تے وائس پرنسپل او آئی سس اسکول امتحانی مرکز غو سپر ٹینڈینٹ تھو۔ تحقیقات غے دوران پتو چلیو جے کھمینی چک پلے اسکول تیں جزوی طور ور سرٹیو وی پرچو این ٹی اے تیں موصول ہوا پرچہ سنگ میل کھائے۔ اور اسے پرچہ مانہ ہزاری باغ گا کلو چک او آئی سس سکول پجایو گیو تھو۔

India Bhutan

بھارت تے بوٹان سانجھا طور ر ور آب و ہوائی تبدیلی، جنگلات، جنگلی حیات غا انتظامات تے ماحول بارے صلاحیتی تعمیر ور کم کرن واسطے تیار ہیں۔ اس بارے بوٹان تے آیا وفد جس غی سربراہی وزیر برائے توانائی تے قدرتی وسائل جم شرینگ کر رہیا ہیں۔ انہاں نے مرکزی وزیر مملکت جنگلات و ماحولیات آب و ہوائی تبدیلی کیرتی ور دہان سنگھ نال نویں دہلی مانہ ملاقات کی۔ اس دوران دوہاں رہنماواں نے ماحولیا تی معاملات ور تفصیلاً گل بات کی اور وزیر موصوف نے اپنا بوٹانی ہم منصب غو بین القوامی ”بیگ کیٹ اتحاد“ مانہ شمولیت ور شکریو ادا کیو۔ یاد رہے مذکورہ بین القوامی اتحاد غی شروعات بھارت نے کی ہے۔ انہاں نے مزید کہیو جے دوائے ملک جغرافیائی تے جمہوریت غا اصولاں مانہ مماثلت رکھیں اور ماحولیا تی تبدیلی دوہاں ملکاں واسطے اہم مدعو ہے۔ اور بوٹانی وزیر موصوف نے کہیو جے بوٹان زیا دہ تر بجلی پائی غے ذریعے ہی پیدا کرے اور کاربن غے تیں منفی رویو رکھے۔

Principle Secretary

محکمہ ذریعی پیداوار غا پرنسپل سیکریٹری شالیندر کمار نے اج اک میٹنگ کر غے محکمہ غا بکھ بکھ جاری ترقیاتی پروجیکٹاں غی عمل آوری غو جائزو لیو۔ اس دوران مال چوکھر محکمہ غا ڈائریکٹر، فروزن سیمر بینک جموں غا منیجر تے محکمہ غا دیگر افسران غے علاوہ دیگر متعلقہ افسروں وی موجود تھا۔ اس موقع ور پرنسپل سیکریٹری نے زور دتو جے دودھ، انڈہ تے مرغیاں غی پیداوار نانہ مزید مضبوط کیو جائے تا نچے گرائیں زندگی نانہ آسان بناویو جا سکے۔ اور افسران ور زور دتو جے وے متین مدت غے اندر اندر اپنا تہ شدہ ہدف پار کرن واسطے واگذار کیا گیا وسائل غو بھرپور استعمال کریں۔

Health Department Poonch

دپتھیریا یعنی حناق غی روک تھام خاطر محکمہ صحت پونچھ نے 6 مہیناں تیں 5 سال غی عمر غا 68 ہزار بچاں تک رسائی خاطر مہم غو آغاز کیو ہے۔ 2 مہینہ تک چلن آلی اس مہم مانہ ساہ لین مانہ دقت پیدا کرن آلی اس خطر ناک بیماری غی روک تھام غا اقدام کیا جائیں گا۔ اس سلسلہ مانہ سی ایم او پونچھ نے 25 سو افراد ور مشتمل طبی عملو اور آساورکراں نانہ تعینات کیو ہے۔ اس ضمن مانہ بولتاں واں سی ایم او پونچھ نے اس طرح کہیو۔۔۔ بانٹ۔۔۔

Khawas Rajouri

ضلع راجوری غا کھواس بلاک نانہ سمپونتا ابھیان غے تحت چنیو گیو ہے۔ اور بلاک غے اندر تیزی نال ترقیاتی کم کاج کیا جا رہیا ہیں۔ اس بلاک غے اندر سڑکاں غی حالت بہتر ہو رہی ہے۔ اور مقامی لوکاں نے سمپورنتا ابھیان غے تحت بلاک غا چنیا جان ور سرکار غو شکریو اور ذاتی خوشی غو اظہار کیو ہے۔ آکاشوانی نال گل کرتاں واں اک مقامی باشندہ نے اس طرح کہیو۔۔۔

یہ خبر تم آکا شوانی جموں تیں سن رہیا ہیں خیراں غا باقی حصہ نال محمد سفیر۔

Amarnath Yatra SSP Ramban

امرناتھ یا ترا 2024 غے چلتیں ضلع رام بن غے اندر سخت حفاظتی انتظامات کیا گیا ہیں۔
ایس ایس پی رام بن انوج کمار نے دسیو ہے کہ یا ترا واسطے 3 سطحی حفاظتی جانچ گریڈ
قائم کی گئی ہے اور یوہ عمل جموں کشمیر پولیس تے دیگر فوج غی ایجنسیاں نال مل غے
کیو جا رہیو ہے۔ اس موقعہ ور بولتاں واں اُن نے اس طرح کہیو۔۔۔ بانٹ۔۔۔

Amarnath Yatra

امرناتھ یا ترا اس سال 29 جون نانہہ شروع ہوئی اور گذشتہ 13 دنان غے اندر عقیدت
مندان غی تعداد مانہہ لگاتار اضافو دیکھیو جا رہیو ہے۔ اس ضمن مانہہ آکا شوانی نال گل با
ت کرتاں واں ڈی سی جموں سچن کمار ویشے نے کہیو ہے کہ امرناتھ یا ترا واسطے آیا
عقیدت مندان واسطے سہولیات مانہہ باہدو کیو گیو ہے اور اندراج، کے وائی سی، آر آئی
ایف ڈی تیں علا وہ بجلی پانی تے صفائی ستھرائی غا بہترین انتظام کیا گیا ہیں۔ اس ضمن
مانہہ بولتاں واں ڈی سی جموں نے اس طرح کہیو۔۔۔ بانٹ۔۔۔

Jammu Search Operation

حفاظتی دستاں نے اج جموں گا سرحدی علاقہ مانہہ مشکوک نقل و حرکت غی سُو لبھن
تیں بعد تلاشی کاروائی شروع کی۔ حفاظتی دستا چاک چوبند ہیں اور لوکاں نانہہ کہیو ہے
جے وے کسے وی قسم غی مشکوک نقل و حرکت دیکھن ور فوج نانہہ مطلع کریں۔ مذکو
رہ تلاشی کا روائی بھارتی فوج، جموں کشمیر پولیس تے سی آر پی ایف غی سنجیالی نال
اکھنور غا گڈا پٹن تے کانی چک جہیڑا دریائے چناب غے کنڈے واقع ہیں مانہہ چلائی جارہی
ہے۔

Agniveer Reservations

مرکزی فوج سابقہ اگنی ویر فوجیاں واسطے 10 فیصد تخصصاں غو ارادو رکھے۔ اگنی پتھ
اسکیم ور بحث مباحثہ غے چلتیں مرکزی فوج نے اعلان کیو ہے کہ وے سابقہ اگنی ویرز
نانہہ 10 فیصد تخصصاں دیں گا۔ مرکزی افواج غا چیف جن مانہہ سرحدی حفاظتی فوج یعنی
بی ایس ایف، سی آر پی ایف، سی آئی ایس ایس بی شامل ہیں نے کہیو ہے کہ
وے سابقہ اگنی ویر فوجیاں نانہہ عمر مانہہ رعایت دیں گا اور ان فوجیاں غو پی ای ٹی
امتحان وی نہیں وے گو۔

BCCI

بھارتی کرکٹ با رے اختیاری بورڈ بی سی سی آئی نے بھارتی کرکٹ ٹیم غا سری لنکا غا
دورہ واسطے گوشوارہ غو اعلان کر دتو ہے۔ یا درہ جے اس دورہ غے دوران بین القوامی
کرکٹ سٹیڈیم پالیکلے مانہہ آئندہ 27/26 تے 29 جولائی نانہہ 3 بین القوامی ٹی ٹوانٹی میچ
کھیڈیا جائیں گا۔ اس تیں بعد کولمبو غا بین القوامی اسٹیڈیم پریم داسا مانہہ اگست غی پہلی 4
تے 7 تاریخ نانہہ 3 ایک روزہ میچ وی کھیڈیا جائیں گا۔ اس سلسلہ مانہہ بھارت کرکٹ ٹیم
22 جولائی نانہہ سری لنکا پُچ جائے گی۔ واضع رہ جے بھارتی کرکٹ ٹیم غا نواں کوچ
گو تم گھمبیر غی اگواہی مانہہ یوہ بھارتی ٹیم غو پہلو ٹورنامنٹ ہے۔ اور مذکو رہ ٹورنامنٹ
واسطے کھڈاریاں غا ناں غی حتمی فہرست اجوں جاری نہیں ہوئی ہے۔

اس غے نال ہی خبراں غو یوہ بلیٹن ختم ہوو۔